



Broj: 01-50-1-15-48/09

Sarajevo, 18. marta 2009. godine

## **ZAPISNIK**

### **48. sjednice Predstavničkog doma Parlamentarne skupštine Bosne i Hercegovine, održane 18. marta 2009. godine**

Sjednica je počela u 9,07 sati. Prisustvovalo je 39 poslanika. Opravdano su odsustvovali: Jovan Todorović, Mehmed Suljkanović i Zlatko Lagumdžija.

Iz Vijeća ministara BiH sjednici su prisustvovali ministri: Dragan Vrankić, Sredoje Nović, Tarik Sadović, Bariša Čolak, Božo Ljubić i Mladen Zirojević, te zamjenik ministra Vilim Primorac.

Iz međunarodnih organizacija sjednicu su pratili predstavnici: OHR-a, OSCE-a, EUPM-a, EUSR-a i britanske ambasade, kao i nevladine organizacije Centri civilnih inicijativa.

U okviru prethodnih pitanja, predsjedavajući Beriz Belkić obavijestio je poslanike o materijalima koji su traženi od Vijeća ministara BiH, na inicijativu poslanika. Tako je već u dnevni red ove sjednice uvršten materijal u vezi s liberalizacijom viznog režima, a u komisijskoj fazi su: Prvi kvartalni pregled realizacije aktivnosti iz Akcionog plana za realizaciju prioriteta iz dokumenta Evropsko partnerstvo BiH, Razrada Akcionog plana za provođenje Privremenog sporazuma i Sporazuma o stabilizaciji i pridruživanju i Izvještaj o stanju provođenja obaveza Privremenog sporazuma i Sporazuma o stabilizaciji i pridruživanju. Predsjedavajući je također napomenuo da je u proceduri Izvještaj o radu Vijeća ministara BiH u 2008. godini i da su do sada samo četiri komisije dostavile mišljenja iz svoje nadležnosti. Pozvao je predsjedavajuće komisija da intenziviraju komisijski rad i blagovremeno dostavljaju mišljenja i izvještaje o materijalima iz svoje nadležnosti.

Predsjedavajući je obrazložio izmjene i dopune u pozivu predloženog dnevnog reda. Rekao je da su iz dnevnog reda skinuti prijedlozi zakona o izmjenama i dopunama Zakona o odbrani BiH i Zakona o službi u Oružanim snagama BiH zato što je Zajednička komisija za odbranu i sigurnost od Kolegija zatražila produženje roka za dostavljanje mišljenja o principima predloženih zakona. Također je Ustavnopravna komisija zatražila produženje roka za dostavljanje Izvještaja o Prijedlogu zakona o izmjenama i dopunama Zakona o Agenciji za rad i zapošljavanje. Kako je po drugi put zatraženo produženje roka, ovaj zahtjev uvršten je u dnevni red ove sjednice radi izjašnjavanja Doma, rekao je predsjedavajući u uvodnim napomenama.

Dalje je predsjedavajući obrazložio uvrštavanje novih tačaka u prijedlog dnevnog reda, koje su ispunile poslovničke uslove i naglasio da su poslanici dobili na klupe izmijenjeni i dopunjeni prijedlog dnevnog reda.

O izmijenjenom i dopunjenom prijedlogu dnevnog reda nije bilo rasprave.

Predsjedavajući Doma Beriz Belkić konstatirao je da 48. sjednica ima sljedeći

## **DNEVNI RED**

1. Usvajanje Zapisnika 47. sjednice Predstavničkog doma;
2. Poslanička pitanja i odgovori;
3. Izjašnjavanje o Prijedlogu zakona o zrakoplovstvu BiH (drugo čitanje);

4. Izjašnjavanje o Prijedlogu zakona o Agenciji za pružanje usluga u zračnoj plovidbi BiH (drugo čitanje);
5. Prijedlog zakona o izmjenama i dopunama Zakona o državnoj službi u institucijama BiH (drugo čitanje);
6. Prijedlog zakona o izmjenama i dopunama Zakona o proizvodnji naoružanja i vojne opreme (drugo čitanje);
7. Prijedlog zakona o izmjenama i dopunama Zakona o finansiranju institucija BiH (prvo čitanje);
8. Prijedlog zakona o izmjenama i dopunama Zakona o osnivanju Izvozno–kreditne agencije BiH (prvo čitanje);
9. Izjašnjavanje Doma o zahtjevu Ustavnopravne komisije za produženje roka za dostavljanje Izvještaja o Prijedlogu zakona o izmjenama i dopunama Zakona o Agenciji za rad i zapošljavanje BiH;
10. Izjašnjavanje Doma o Inicijativi poslanika Martina Raguža i Vinka Zorića za formiranje radne grupe za izradu teksta novog Ustava BiH;
11. Izvještaj komisije Kolegija o nastojanju za postizanje saglasnosti o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika (zakon u drugom čitanju);
12. Izvještaj komisije Kolegija o nastojanju za postizanje saglasnosti o zahtjevu poslanika Sefera Halilovića za razmatranje Prijedloga zakona o izmjenama i dopunama Zakona o slobodi pristupa informacijama u Bosni i Hercegovini, po hitnom postupku, u skladu s članom 127. Poslovnika;
13. Plan aktivnosti za ispunjavanje obaveza iz preporuka Evropske komisije u vezi s Mapom puta za liberalizaciju viznog režima za građane Bosne i Hercegovine;
14. Prijedlog usaglašenih zbirnih i pojedinačnih zaključaka Komisije za finansije i budžet Predstavničkog doma i Komisije za finansije i budžet Doma naroda Parlamentarne skupštine BiH o razmatranim revizorskim izvještajima finansijskog poslovanja institucija BiH za 2007. godinu;
15. Imenovanje dva člana Ureda za razmatranje žalbi iz reda stručnjaka upravnog prava, predlagач: Vijeće ministara BiH;
16. Imenovanje tri člana u Zajedničku komisiju oba doma radi postizanja saglasnosti o identičnom tekstu Zakona o dopuni Zakona o Javnom radiotelevizijskom sistemu BiH;
17. Davanje saglasnosti za ratifikaciju:
  - a) Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat šumskih i planinskih područja,
  - b) Sporazuma između Vijeća ministara BiH i Vlade Republike Albanije o međunarodnom drumskom prijevozu putnika i tereta,
  - c) Deklaracije o dugoročnom programu regionalne saradnje i razvoja mentalnog zdravlja u zemljama Jugoistočne Evrope,
  - d) Sporazuma o finansiranju između BiH i Komisije Evropskih zajednica o programu finansiranja učešća BiH u ERDF Evropskom programu međunarodne teritorijalne saradnje Prostor jugoistočne Evrope na osnovu instrumenata za pretprijetnu pomoć (IPA) komponenta prekogranične saradnje za 2007.godinu,
  - e) Ugovora o finansiranju između BiH i Evropske investicione banke – Projekat Koridor Vc – prva faza – Sjever,
  - f) Sporazuma o privrednoj saradnji između Vijeća ministara BiH i Vlade Republike Slovenije.

#### **Ad. 1. Usvajanje Zapisnika 47. sjednice Predstavničkog doma**

O Zapisniku nije bilo rasprave.

Prilikom glasanja, Zapisnik 48. sjednice Doam usvojen je sa 35 glasova "za" (Federacija BiH 23, RS 12) i jednim "suzdržanim".

## Ad. 2. Poslanička pitanja i odgovori

Predsjedavajući Belkić konstatirao je da su od prošle do ove sjednice odgovore na pitanja dobili:

- Bakir Izetbegović, Šemsudin Mehmedović, Husein Nanić, Salko Sokolović i Lazar Prodanović, od Vijeća ministara BiH, na pitanja postavljena na 42. sjednici;
- Drago Kalabić, Husein Nanić, Denis Bećirović, Vinko Zorić i Mirko Okolić, od Vijeća ministara BiH, na pitanja postavljena na 44. sjednici;
- Azra Alajbegović je od Zajedničke službe Parlamentarne skupštine BiH dobila izmijenjeni odgovor na pitanje postavljeno na 40. sjednici;
- Šefik Džaferović i Denis Bećirović, od Vijeća ministara BiH, na pitanja postavljena na 45. sjednici;
- Husein Nanić je od BH Gasa dobio odgovor na pitanje postavljeno na 46. sjednici.

Odgovore su komentirali: Husein Nanić, Lazar Prodanović, Denis Bećirović i Šefik Džaferović.

Denis Bećirović izrazio je nezadovoljstvo odgovorom na pitanje postavljeno na 44. sjednici vezano za kupovinu automobila za predsjedavajućeg Vijeća ministara BiH, rekavši uz ostalo: „Ja mislim da na ovakav način ne treba odgovarati poslanicima, ovo je zaista i tragično i komično kakve odgovore dobivamo ovdje na Parlamentu... Ponavljam, moje pitanje je glasilo: Kolika je tačno cijena tog auta i tražim da nam se javno kaže koliko je koštao taj automobil?“

Husein Nanić rekao je da je zadovoljan odgovorom na pitanje koje je postavio na 46. sjednici, a koje je dobio od BH Gasa, ali da je isto pitanje postavio i Federalnom ministarstvu industrije, energetike i rudarstva i da od tog ministarstva traži da dostavi odgovor.

Postavljena su nova poslanička pitanja kako slijedi:

### **Milorad Živković:**

„Zašto se kasni s imenovanjem šest ambasadora, a radi se o pozicijama koje, prema dogovoru, pripadaju licima iz bošnjačkog naroda, kada se zna da nam DKP mreža ne funkcioniše na najbolji način, a nepostojanje adekvatnog kadra u značajnim ambasadama, kao što su npr. Srbija, Kina, Pakistan itd., dodatno otežava vođenje vanjske politike i negativno utiče na imidž BiH?“

### **Husein Nanić:**

„Putem sredstava informiranja javnost je djelimično upoznata s projektom izgradnje mreže autoputeva i brzih puteva u Republici Srpskoj. S obzirom da Unsko-sanski kanton graniči s Republikom Srpskom te da je preko teritorije Republike Srpske najbliža komunikacija prema Sarajevu, tražim od resornog ministarstva da mi dostavi informaciju o planovima izgradnje autoputeva koji povezuju Unsko – sanski kanton sa Sarajevom i ostalim dijelom BiH, a posebno na onaj dio puta koji Bosanski Novi / Novi Grad povezuje s Banjom Lukom do Doboja i dalje se veže na Koridor Vc, kao i plan izgradnje putne komunikacije između Splita u Republici Hrvatskoj i Banje Luke preko Livanjskog kantona.“

### **Mirko Okolić:**

„Prije više od tri mjeseca, tačnije 9.12.2008., Općina Doboj je Vijeću ministara BiH, odnosno njegovoj Komisiji za državnu imovinu, uputila akt br. 02-022-1-2880/08, s prijedlogom da izuzme državnu imovinu od privremene zabrane. Razlog je to što su Vlada RS-a i Općina Doboj potpisale program stambenog zbrinjavanja porodica poginulih boraca i ratnih vojnih invalida od prve do četvrte kategorije u Općini Doboj.“

„Moje pitanje Vijeću ministara BiH glasi: Kada Komisija misli uzeti u razmatranje i dati odgovor, a ujedno i apel da Komisiji naloži da to uradi u što kraćem roku, što, u stvari, i jeste suština. Odgovor tražim u pisanoj formi, a po donošenju odluke Komisije zbog hitnosti stvari, iako to nije po Poslovniku i uobičajeno, molim da, ako je to moguće, budem obaviješten telefonom ili e - mailom. U prilogu dostavljam dopis Općine Doboj i izvod iz nadležnosti Komisije po kojem je ona dužna dati ovo izuzeće.“

**Šemsudin Mehmedović:**

„1. Prvo pitanje upućeno je Vijeću ministara BiH, odnosno Ministarstvu sigurnosti BiH. Tražim da mi se dostavi sistematizacija radnih mjesta u DGS-u ili Graničnoj policiji s brojčanim pokazateljima popunjenosti s posebnim osvrtom na nacionalnu strukturu zaposlenih, a posebno rukovodnih mjesta uključujući i savjetnike“.

2. Drugo je upućeno direktoru Granične policije ili DGS-a. Zamjenik direktora Alagić suspendiran je već 15 mjeseci, a da ga niko nije ni pozvao na bilo kakav razgovor, a po važećim propisima, suspenzija može trajati do 12 mjeseci. Pitanje je šta direktor Granične policije namjerava uraditi po ovom pitanju?

3. Kada će biti usklađeni koeficijenti za obračun plaća za poslove koji po stepenu složenosti spadaju u pomoćno-tehničke poslove (operativno - tehnički složeni poslovi) na nivou Vijeća ministara BiH?

4. Koji je vremenski rok da revizija utvrdi ovo stanje i donese stav o ovom pitanju gdje neće biti mjesta degradiranju zaposlenih po bilo kojoj osnovi?“

**Sadik Bahtić:**

„Kada će Vijeće ministara BiH, na osnovu zaključka Parlamenta i Kolegija, pripremiti i poslati Predstavničkom domu tačku dnevnog reda: Recesija - svjetska ekonomka kriza, uticaj na ekonomiju BiH i mjere za prevazilaženje krize.“

**Slavko Jovičić:**

Pridružio se pitanju Sadika Bahtića, jer je i on podnio sličnu inicijativu, te, uz ostalo, rekao:

„Gospodo iz Vijeća ministara, nažalost, nemam ovlaštenja da vam naredim da dođete da ovo pripremite, ali vas molim kao prijatelje koje uvažavam. Nije važno ko je podnio inicijativu. Pridodajem još jedno pitanje, a to je sigurnost zemlje. Dakle, dvije glavne stvari najvažnije za svaku zemlju jesu - kako će narod preživjeti i hoće li narod biti siguran.“

**Azra Alajbegović:**

„1. Postavljam pitanje Ministarstvu vanjskih poslova BiH i Ministarstvu odbrane BiH, a ono glasi – Koji su problemi vezani za izvještavanje o ispunjavanju međunarodnih obaveza BiH u okviru UN-a i OSCE-a za 2008. godinu, i molila bih da mi se u odgovoru dostavi akcenat vezan za poteškoće s kojima se susreću ova dva ministarstva“.

2. Pitam Ministarstvo civilnih poslova BiH - Koji je bio zakonski osnov da se uradi legislativni okvir za uspostavljanje Regionalnog centra za saradnju o mentalnom zdravlju od vlasti BiH, s obzirom da ta deklaracija nije prošla proces i certifikaciju“.

**Željko Kuzmanović:**

„Povodom nedavne izjave mog uvaženog kolege Adema Huskića, date jednom sarajevskom listu, po kojoj su srpski poslanici glasali protiv usvajanja Zakona o oružju, kako bi se dozvolilo naoružavanje paravojnih formacija, postavljam pitanje Ministarstvu sigurnosti BiH, nadležnim agencijama i entitetskim ministarstvima unutrašnjih poslova:

Da li imaju saznanja ili informaciju o postojanju bilo kakvih paravojnih formacija na teritoriji BiH i RS-a i ukoliko te formacije zaista postoje, kakve se akcije preduzimaju u njihovom suzbijanju “?

**Lazar Prodanović:**

„Želim da mi se dostavi koliki broj je zaposlenih službenika u prošloj godini primljen putem konkursa u Agenciju za državnu službu i u kojim institucijama i koliko je od tog broja ranije radilo na radnim mjestima za koje je kasnije raspisan konkurs“?

**Rifat Dolić:** „1. Koliki je broj i kakva je predmetna personalna i druga struktura tužbi koje se protiv BiH vode pred Međunarodnim sudom za ljudska prava u Strazburu i koliko u prosjeku traje procesuiranje tih tužbi“?

2. Ministru pravde u Vijeću ministara BiH – Koliki je broj i kolika je finansijska vrijednost pravosnažnih presuda sudova u BiH na teret budžeta institucija BiH na svim nivoima, čije izvršenje je odgođeno u skladu s donesenim entitetskim zakonima o odgađanju izvršenja pravosnažnih presuda i neodrživoj pravnoj inovaciji „ako njihovo izvršenje ugrožava funkcioniranje institucija vlasti“?

Koliko su ovim odgađanjem izvršenja pravosnažnih presuda ugrožena ljudska prava i pravni sistem u BiH i u kojoj mjeri je prisutna opasnost zloupotrebe ovakvih zakonskih odredbi od institucija vlasti u BiH“?

**Velimir Jukić:**

1. Šta rade Vijeće ministara BiH i resorna ministarstva na ubrzanju i završetku svih potrebnih aktivnosti – završetak projektne dokumentacije, imovinskopravni poslovi na Koridoru Vc, osiguranje sredstava za gradnju autoputeva, operativno raspolaganje obećanim sredstavima od oko 400 miliona eura od EBRD-a i drugih izvora?

2. Ima li Vijeće ministara BiH razrađen i prihvaćen model finansiranja gradnje autoputa na Koridoru Vc?

**Adem Huskić:**

„Pitam predsjedavajućeg Vijeća ministara BiH - Gospodine predsjedavajući, s obzirom da ste izjavili da postoje paralelizmi u institucijama BiH, molim Vas da mi odgovorite na pitanje: U kojim institucijama postoje paralelizmi, ko stoji iza njih, na koji način se oni manifestiraju i šta ste preduzeli kako biste eliminirali sve paralelizme u BiH“?

**Azra Hadžiahmetović:**

„Ja nemam poslaničko pitanje, ali imam poslaničku inicijativu da se pokrene postupak za potpisivanje dva akta - Dodatnog protokola na krivičnopravnu konvenciju o korupciji. Riječ je o dokumentu Vijeća Evrope. I drugo - Konvencije Organizacije za ekonomsku saradnju i razvoj OECD o borbi protiv podmićivanja stranih javnih službenika“.

**Niko Lozančić:**

„Moje pitanje upućeno je Visokom sudskom i tužilačkom vijeću BiH:

1. Kada ću dobiti odgovore na pitanja postavljena na 45. i 47. sjednici ovog doma?

2. Kako mi još uvijek nisu odgovorili na pitanje - Kako i na osnovu kojih propisa i kriterija su s svih čelnih pozicija u sudovima i tužilaštvima BiH i entiteta isključili kadrove hrvatske nacionalnosti, sada postavljam pitanje: Kakva je uopće nacionalna struktura svih sudova i tužilaštava u BiH uključujući osnovne, odnosno općinske, kantonalne, odnosno okružne, entitetske, Sud i Tužilaštvo BiH i je li ta struktura u skladu sa Ustavom BiH“?

**Ad. 3. Izjašnjavanje o Prijedlogu zakona o zrakoplovstvu BiH (drugo čitanje)**

Predsjedavajući Belkić podsjetio je da je na prošloj sjednici Doma odgođeno izjašnjavanje o Prijedlogu zakona o zrakoplovstvu BiH u drugom čitanju.

Nije bilo rasprave.

Prilikom glasanja, Dom je, sa 34 glasa "za" (Federacija BiH 24, RS 10) i tri "protiv", usvojio Zakon o zrakoplovstvu BiH.

**Ad. 4. Izjašnjavanje o Prijedlogu zakona o Agenciji za pružanje usluga u zračnoj plovidbi BiH (drugo čitanje)**

Također je na prošloj sjednici odgođeno izjašnjavanje i o Prijedlogu zakona iz ove tačke, rekao je u uvodnim napomenama predsjedavajući Beriz Belkić.

Drago Kalabić učestvovao je u raspravi i predložio zaključak.

Momčilo Novaković imao je poslovničku intervenciju – da je rasprava završena na prošloj sjednici, s čime se složio predsjedavajući Belkić.

Prilikom glasanja Dom je usvojio Zakon o Agenciji za pružanje usluga u zračnoj plovidbi BiH. "Za" su glasala 34 poslanika (iz Federacije BiH 24, iz RS-a 10), "protiv" su glasala dva, "suzdržala" su se dva poslanika.

Zatim je Dom, sa 23 glasa "za" (Federacija BiH 14, RS devet), sedam "protiv" i osam "suzdržanih", na prijedlog Drage Kalabića, usvojio sljedeći zaključak:

**Predstavnički dom zahtijeva da se urgentno pristupi realizaciji Zaključaka Vijeća ministara BiH sa 60. sjednice, održane 25.9.2008., koji su doneseni uz Prijedlog zakona o Agenciji za pružanje usluga u zračnom saobraćaju BiH, do završetka zakonodavnog postupka u Domu naroda Parlamentarne skupštine BiH.**

#### **Ad. 5. Prijedlog zakona o izmjenama i dopunama Zakona o državnoj službi u institucijama BiH (drugo čitanje)**

U uvodnim napomenama predsjedavajući Belkić podsjetio je da je nadležna komisija usvojila 10 amandmana koji su sadržani u Izvještaju, kao i da poslanici Milica Marković i Vinko Zorić u plenarnoj fazi brane po dva amandmana na Prijedlog zakona iz ove tačke.

U raspravi su učestvovali: Halid Genjac, Milica Marković, Šefik Džaferović, Momčilo Novaković, Velimir Jukić, Vinko Zorić i Martin Raguž.

Prilikom izjašnjavanja, Dom se prvo izjasnio o amandmanima Milice Marković i Vinka Zorića.

Amandmani Milice Marković nisu usvojeni. "Za" prvi amandman glasalo je 11, "protiv" 20, "suzdržalo" se sedam poslanika. "Za" drugi amandman glasalo je 13, "protiv" 19, "suzdržalo" se šest poslanika.

Amandmani Vinka Zorića su usvojeni. "Za" prvi amandman glasalo je 19 (Federacija BiH 12, RS sedam), "protiv" 14, "suzdržalo" se pet poslanika. "Za" drugi amandman glasalo je 20 (Federacija BiH 12, RS osam), "protiv" 14, "suzdržala" su se četiri poslanika.

Poslije glasanja o amandmanima Dom je usvojio Prijedlog zakona o izmjenama i dopunama Zakona o državnoj službi u institucijama BiH u drugom čitanju. „Za“ Prijedlog zakona je glasao 31 poslanik (Federacija 25, RS šest), pet je glasalo „protiv“ jedan je bio „suzdržan“..

Zatim je na glasanje dat prijedlog zaključka Milice Marković, o kojem je tražila glasanje u slučaju da se ne usvoje njeni amandmani. Prijedlog zaključka glasi:

„Zadužuje se Vijeće ministara BiH da do 1.maja 2009. u parlamentarnu proceduru po skraćenom postupku uputi Zakon o obavezama, pravima i dužnostima rukovodnih lica koji će obuhvatiti generalne sekretare institucija, sekretare ministarstava, pomoćnike ministara, kojim će navedena lica imenovati Vijeće ministara BiH na period od pet godina“.

"Za" ovaj zaključak glasalo je 12, "protiv" 18, "suzdržalo" se sedam poslanika. Prema tome, zaključak nije usvojen.

Dom se zatim izjasnio o zaključku koji je u raspravi predložio Velimir Jukić, a koji glasi:

“Nalaže se Ministarstvu pravde BiH i Agenciji za državnu službu da urade podzakonske akte ili dopune postojeće takvim rješenjima koja će osigurati dosljedno poštivanje i primjenu najvažnijih standarda za objektivno ocjenjivanje prilikom testiranja znanja i općih sposobnosti kandidata za prijem u državnu službu. Cilj je svesti subjektivno ocjenjivanje na minimalnu mjeru, a postupak prijema kandidata učiniti transparentnijim i pomoću mjerljivih parametara objektivnijim“.

Ovaj zaključak je usvojen sa 32 glasa „za“ (Federacija 23, RS devet), jednim „protiv“ i pet „suzdržanih“.

#### **Ad. 6. Prijedlog zakona o izmjenama i dopunama Zakona o proizvodnji naoružanja i vojne opreme (drugo čitanje)**

Poslije kratkih uvodnih napomena predsjedavajućeg Belkića, u ime nadležne Zajedničke komisije za odbranu i sigurnost govorio je Šefik Džaferović.

Prijedlog zakona u drugom čitanju usvojen je jednoglasno, sa 38 glasova "za" (Federacija BiH 25, RS 13).

#### **Ad.7. Prijedlog zakona o izmjenama i dopunama Zakona o finansiranju institucija BiH (prvo čitanje)**

Predsjedavajući Belkić dao je uvodne napomene.

Nije bilo rasprave.

Sa 37 glasova "za" (Federacija BiH 24, RS 13) i jednim "suzdržanim", usvojen je Prijedlog zakona iz ove tačke u prvom čitanju.

#### **Ad. 8. Prijedlog zakona o izmjenama i dopunama Zakona o osnivanju Izvožno–kreditne agencije BiH (prvo čitanje)**

Poslije uvodnih napomena predsjedavajućeg, nije bilo rasprave o Prijedlogu zakona.

Prilikom glasanja, Prijedlog zakona nije dobio entitetsku većinu – "za" su glasala 23 (Federacija BiH 20, RS tri), "protiv" 10, "suzdržalo" se pet poslanika.

Odmah je provedeno usaglašavanje u Kolegiju kao komisiji i nije bilo saglasnosti.

U drugom krugu glasanja "za" Prijedlog zakona glasala su 22 poslanika, "protiv" 11 poslanika iz Republike Srpske, što je više od dvije trećine iz entiteta.

Prema tome, Prijedlog zakona o izmjenama i dopunama Zakona o osnivanju Izvožno-kreditne agencije BiH odbijen je u prvom čitanju

#### **Ad. 9. Izjašnjavanje Doma o zahtjevu Ustavnopravne komisije za produženje roka za dostavljanje Izvještaja o Prijedlogu zakona o izmjenama i dopunama Zakona o Agenciji za rad i zapošljavanje BiH**

U uvodnim napomenama predsjedavajući je rekao da je Ustavnopravna komisija drugi put zatražila produženje roka za dostavljanje izvještaja, te da, u skladu s Poslovníkom, o tome treba da odluči Dom.

Nije bilo rasprave.

Dom je odobrio produženje roka za dostavljanje Izvještaja o Prijedlogu zakona o izmjenama i dopunama Zakona o Agenciji za rad i zapošljavanje do 26.marta 2009. godine.

#### **Ad. 10. Izjašnjavanje Doma o Inicijativi poslanika Martina Raguža i Vinka Zorića za formiranje radne grupe za izradu teksta novog Ustava BiH**

Predsjedavajući Belkić je u uvodnim napomenama podsjetio na sadržaj inicijative i Mišljenje Ustavnopravne kao nadležne komisije.

Bakir Izetbegović je u kratkoj diskusiji upoznao Dom da je Klub SDA uputio u proceduru sličnu inicijativu.

Martin Raguž podnio je Domu šire obrazloženje Inicijative.

Nakon obrazloženja, vođena je duža rasprava u kojoj su učestvovali: Remzija Kadrić, Ekrem Ajanović, Jozo Križanović, Adem Huskić, Vinko Zorić, Sadik Bahtić, Šefik Džaferović, Azra Hadžiahmetović, Momčilo Novaković, Martin Raguž, Denis Bećirović, Milorad Živković i Sefer Halilović.

Prilikom glasanja, Inicijativa nije dobila entitetsku većinu. "Za" je glasalo 27 poslanika (iz Federacija 24, iz RS tri), "protiv" 10, "suzdržao" se jedan poslanik.

Odmah je provedeno usaglašavanje u Kolegiju kao komisiji i nije bilo saglasnosti.

U drugom krugu glasanja "za" Inicijativu je glasalo 27 poslanika, "protiv" je glasalo 11 – pri čemu iz Republike Srpske 10, što je dvije trećine iz entiteta. Prema tome, Inicijativa nije prihvaćena.

Zatim se Dom izjasnio o zaključku koji je u raspravi predložio Jozo Križanović. "Za" zaključak su glasala 32 poslanika (Federacija BiH 24, RS osam), "protiv" su glasala tri, "suzdržala" su se tri poslanika. Prema tome, usvojen je zaključak koji glasi:

**1. Predstavnički dom Parlamentarne skupštine BiH prihvata inicijativu o nužnosti počinjanja intenzivnog rada na ustavnoj reformi.**

**2. Obavezuje se Ustavnopravna komisija Predstavničkog doma i Kolegij Predstavničkog doma u proširenom sastavu da, u saradnji s Domom naroda, razrade metod i sadržaj rada na ovoj reformi i da ga dostave Predstavničkom domu do naredne sjednice.**

**Ad.11. Izvještaj komisije Kolegija o nastojanju za postizanje saglasnosti o Prijedlogu zakona o maloljetnim počinocima krivičnih djela i krivičnopravnoj zaštiti djece i maloljetnika (zakon u drugom čitanju)**

Predsjedavajući je podsjetio da nije postignuta saglasnost u Kolegiju kao komisiji.

U drugom krugu glasanja "za" Prijedlog zakona iz ove tačke glasalo je 25 poslanika, a "protiv" je glasalo 11 – svi iz RS-a, što je više od dvije trećine. Prema tome, odbijen je u drugom čitanju Prijedlog zakona o maloljetnim počinocima krivičnih djela i krivičnopravnoj zaštiti djece i maloljetnika.

**Ad. 12. Izvještaj komisije Kolegija o nastojanju za postizanje saglasnosti o zahtjevu poslanika Sefera Halilovića za razmatranje Prijedloga zakona o izmjenama i dopunama Zakona o slobodi pristupa informacijama u BiH, po hitnom postupku, u skladu s članom 127. Poslovnika**

Predsjedavajući je podsjetio da također nije bilo saglasnosti o zahtjevu Sefera Halilovića.

U raspravi su učestvovali Sefer Halilović i Milorad Živković.

U drugom krugu glasanja usvojen je zahtjev za hitni postupak – "za" je glasalo 19, "protiv" 16 – pri čemu je iz Republike Srpske bilo osam "protiv", što je manje od dvije trećine iz entiteta, a "suzdržala" su se tri poslanika.

Nakon glasanja o zahtjevu za hitni postupak, Dom se izjasnio o Prijedlogu zakona.

Sa 21 glasom "za" (Federacija BiH 16, RS pet), devet "protiv" i osam "suzdržanih", usvojen je Zakon o izmjenama i dopunama Zakona o slobodi pristupa informacijama u Bosni i Hercegovini.

**Ad . 13. Plan aktivnosti za ispunjavanje obaveza iz preporuka Evropske komisije u vezi s Mapom puta za liberalizaciju viznog režima za građane Bosne i Hercegovine**

U uvodnim napomenama, uz ostalo, predsjedavajući Belkić rekao je da je, na inicijativu Zajedničke komisije za evropske integracije, ovaj materijal zatražen od Vijeća ministara BiH i da se slijedom toga nalazi na dnevnom redu Doma. Napomenuo je da je, pored materijala koji je dostavilo Vijeće ministara BiH, i Interresorna radna grupa dostavila Izvještaj o svom radu s više priloga, da je materijal jako obiman i da poslanici koji žele mogu izvršiti uvid u materijal u Pisarnici Parlamentarne skupštine BiH. Ukazao je i na Mišljenje Zajedničke komisije za evropske integracije o materijalu i zaključak u Mišljenju, da se od Vijeća ministara BiH zatraži da na sjednici Doma obrazloži razloge kašnjenja provođenja pojedinih mjera i predloži prihvatljive načine rješavanja spornih mjera iz Mape puta.

Nakon napomena u vezi s materijalom, predsjedavajući je konstatirao da na sjednici nema nikoga iz Vijeća ministara BiH ko bi dao određena pojašnjenja o predmetnom materijalu i odgovorio prema zaključku Komisije.

Jozo Križanović iznio je intervenciju i rekao da tokom rasprave o ovoj tački ne bi trebalo zanemariti zaključak nadležne komisije.

Poslije intervencije Joze Križanovića, Halid Genjac je, u svojstvu predsjedavajućeg nadležne komisije, iznio šire izlaganje.



Poslije izlaganja Halida Genjca, data je kraća pauza, nakon koje je predsjedavajući rekao da se pokušalo osigurati prisustvo predstavnika Vijeća ministara BiH, ali da u ovom slučaju postoji i problem što je tek jučer ova tačka uvrštena u dnevni red jer je tek pristiglo i Mišljenje Komisije, tako da Vijeće ministara BiH nije ni znalo da je ovo u dnevnom rdu.

Nastavljena je rasprava u kojoj su učestvovali: Azra Hadžiahmetović, Milorad Živković, Adem Huskić, Mirko Okolić, Denis Bećirović, Ekrem Ajanović, Jozo Križanović, Šemsudin Mehmedović, Drago Kalabić, Rifat Dolić i Slavko Jovičić.

Poslije rasprave, predsjedavajući Belkić rekao je da je izneseno više prijedloga da se na ovoj sjednici ne raspravlja o ovoj tački dnevnog reda, već da se odgodi za sjednicu Doma 1. aprila i da se osigura prisustvo predstavnika Vijeća ministara BiH koji bi mogao dati odgovore kako je predložila Komisija.

Sa 22 glasa "za" (Federacija BiH 11, RS 11) i pet "protiv", usvojen je prijedlog da se ova tačka uvrsti u dnevni red sjednice Doma koja će biti održana 1. aprila 2009., uz obavezu prisustva predstavnika Vijeća ministara BiH.

**Ad. 14.** Prijedlog usaglašenih zbirnih i pojedinačnih zaključaka Komisije za finansije i budžet Predstavničkog doma i Komisije za finansije i budžet Doma naroda Parlamentarne skupštine BiH o razmatranim revizorskim izvještajima finansijskog poslovanja institucija BiH za 2007. godinu

Predsjedavajući je u uvodnim napomenama podsjetio na raspravu o revizorskim izvještajima na 11. zajedničkoj sjednici oba doma i zaključak usvojen tom prilikom da se o zbirnim zaključcima izvrši usaglašavanje u komisijama za finansije i budžet oba doma, nakon čega je naša komisija Domu dostavila zbirne zaključke koji su na dnevnom redu.

Predsjedavajući Komisije za finansije i budžet Sadik Bahtić iznio je kratko obrazloženje.

Prilikom glasanja, sa 34 glasa "za" (Federacija BiH 21, RS 13) i tri "suzdržana", usvojeni su sljedeći zbirni zaključci povodom razmatranja revizorskih izvještaja o finansijskom poslovanju institucija BiH za 2007. godinu:

- 1) Domovi javno pohvaljuju i ističu transparentnost rada, usklađenost poslovanja s važećim zakonskim propisima i savjesno raspolaganje budžetskim sredstvima sljedećih institucija Bosne i Hercegovine:
  1. Agencije za statistiku BiH;
  2. Agencije za javne nabavke BiH;
  3. Pravobranilaštva BiH;
  4. Službe za zajedničke poslove BiH;
  5. Tužilaštva BiH;
  6. Agencije za državnu službu BiH;
  7. Arhiva BiH;
  8. Fonda za povratak BiH;
  9. Komisije za imovinske zahtjeve raseljenih lica BiH;
  10. Odbora državne službe za žalbe BiH;
  11. Centralne izborne komisije BiH.
- 2) Domovi usvajaju predložene zaključke za 45 institucija BiH sadržane u komisijskim izvještajima, a čiji su revizorski izvještaji finansijskog poslovanja za 2007. godinu dobili 'mišljenje s rezervom'.  
Pojedinačni zaključci za 45 institucija BiH sadržani su u prilogu br. 1 ovog izvještaja.
- 3) Domovi traže od Vijeća ministara BiH da:
  - 3.1. do kraja prvog kvartala razmotri revizorske izvještaje za 2007. godinu;
  - 3.2. uvede praksu redovnog razmatranja revizorskih izvještaja i ključnih preporuka revizije koje su u njegovoj nadležnosti;
  - 3.3 ustanovi obavezu utvrđivanja diciplinske odgovornosti u institucijama BiH za ponavljanje nalaza revizije;
  - 3.4. o realizaciji ovog zaključka informira domove.

- 4) Domovi nalažu Vijeću ministara BiH da obaveže Ministarstvo finansija i trezora BiH da, u roku od 90 dana od dana prijema ovog zaključka, sačini programe obuke zaposlenih u institucijama BiH.  
Domovi preporučuju obuku iz sljedećih oblasti:
- 4.1 Planiranje budžeta, nadzor nad izvršenjem budžeta;
  - 4.2. Primjena propisa iz oblasti javnih nabavki;
  - 4.3. Donošenje i primjena pravilnika o sistemu internih kontrola, izgradnja sistema internih kontrola;
  - 4.4. Sastavljanje finansijskih izvještaja;
  - 4.5. Obavljanje popisa imovine, sredstava, izvora sredstava i obaveza.
  - 4.6. Jačanje nadzora i kontrolnih postupaka u kategoriji rashoda, gdje nedostaju sistemska ili interna pravila potrošnje.
- 5) Domovi zadužuju Vijeće ministara BiH da do kraja tekuće godine obavi pripreme i provede što veći broj zajedničkih nabavki kako bi se pojedinačne institucije rasteretile onih nabavki koje se pojavljaju u svim ili u skoro svim institucijama koje imaju male godišnje iznose na pojedinačnom nivou budžetskog korisnika ili veoma ograničenu konkurenciju. Vijeće ministara BiH dužno je obavijestiti institucije o tome koje zajedničke nabavke neće biti moguće okončati do isteka januara 2009. godine, kako bi se pomoglo planiranje i preuzimanje obaveze nabavki na pojedinačnom nivou. Tokom planiranja zajedničkih nabavki, potrebno je razmotriti sljedeće stavke kao prijedloge komisija:
- 5.1. Izdaci za kompjuterski materijal (konto: 613412); kancelarijski materijal (konto: 613417); ostali potrošni materijal (konto: 613418), izdaci za ostali administrativni materijal (konto: 613419); materijal za pripremanje (konto: 613483); materijal za čišćenje (konto: 613484); registracija motornih vozila (konto: 613523); usluge održavanja softvera (konto: 613727); kompjuterska oprema (konto: 821312); softveri (konto: 821314); druge sitne nabavke opreme, materijala i nabavke usluga koje jako opterećuju institucije i koje na pojedinačnom nivou imaju simboličan godišnji iznos rashoda, veoma rijetku konkurenciju, i sl.
- 6) Domovi nalažu Vijeću ministara BiH da obaveže Ministarstvo finansija i trezora BiH da, u roku od 90 dana od dana prijema ovog zaključka, sačini Program izrade propisa i instrukcija za budžetske korisnike s ciljem otklanjanja uzroka koji utiču na pojavu i ponavljanje brojnih revizorskih nalaza.
  - 7) Domovi traže informaciju od Državne agencije za istrage i zaštitu i Tužilaštva BiH o preduzetim aktivnostima radi utvrđivanja prekršajne ili krivične odgovornosti nadležnih lica u vezi sa sadržajem revizorskih izvještaja finansijskog poslovanja s kvalifikacijom „rezerva“ (45 izvještaja) koje je Ured dostavio 8.7.2008., te da dostave godišnji izvještaj o tim nalazima Parlamentarnoj skupštini BiH.
  - 8) Potrebno je da institucije BiH dosljedno realiziraju komisijske zaključke iz pojedinačnih izvještaja usvojene u domovima za 2007. godinu, jer će se u narednom periodu insistirati na primjeni člana 16.(4) Zakona o reviziji institucija BiH.
  - 9) Nalaže se Ministarstvu finansija i trezora BiH da, u roku od 90 dana od dana prijema ovog zaključka, izradi sve podzakonske akte utvrđene Zakonom o plaćama i naknadama u institucijama BiH.
  - 10) Domovi nalažu Vijeću ministara BiH da predloži način rješavanja kolektivnog osiguranja zaposlenih u institucijama BiH.
  - 11) Bez namjere da ulazi u nezavisnost rada Ureda za reviziju institucija BiH, komisije traže od Ureda da upozna članove komisija za finansije i budžet oba doma s internim pravilima i kriterijima za izražavanje mišljenja revizora.
  - 12) Domovi traže od Vijeća ministara BiH da preduzme sve mjere kako bi se riješilo pitanje Pravilnika o unutrašnjoj organizaciji Ureda za razmatranje žalbi BiH.
  - 13) Domovi ponovo traže od Vijeća ministara BiH da preduzme sve mjere radi imenovanja dva člana koji nedostaju u Uredu za razmatranje žalbi BiH.
  - 14) Nalaže se Ministarstvu finansija i trezora BiH da u planiranje budžeta institucija BiH uključi članove kolegija komisija za finansije i budžet oba doma.
  - 15) Domovi zadužuju Vijeće ministara BiH da pokrene pitanje izmjena rokova zastarjelosti u članu 25. Pravilnika o disciplinskoj odgovornosti državnih službenika u institucijama BiH ("Službeni glasnik BiH", br. 20/03) i prilagodi ih rokovima u kojima se razmatraju revizorski izvještaji.

**Ad. 15. Imenovanje dva člana Ureda za razmatranje žalbi iz reda stručnjaka upravnog Prava, predlagač: Vijeće ministara BiH**

Poslije kraćih uvodnih napomena nije bilo rasprave.

Na prijedlog Vijeća ministara BiH, za članove Ureda za razmatranje žalbi iz reda stručnjaka upravnog prava imenovani su Stipe Petričević i Ostoja Kremenović. "Za" imenovanje je glasalo 30 poslanika (Federacija BiH 20, RS 10), "protiv" su glasala četiri, "suzdržala" su se četiri poslanika.

**Ad. 16. Imenovanje tri člana u Zajedničku komisiju oba doma radi postizanja saglasnosti o identičnom tekstu Zakona o dopuni Zakona o Javnom radiotelevizijskom sistemu BiH**

U Zajedničku komisiju oba doma, radi usaglašavanja identičnog teksta Zakona o dopuni Zakona o Javnom radiotelevizijskom sistemu BiH, imenovani su: Sadik Bahtić, Slavako Matić i Branko Dokić. "Za" je glasalo 28 (Federacija BiH 19, RS devet), jedan je glasao "protiv", šest poslanika se "suzdržalo".

**Ad. 17. Davanje saglasnosti za ratifikaciju:**

- a) Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao Agencije za realizaciju sredstava Globalnog fonda za okoliš – Projekat šumskih i planinskih područja,
- b) Sporazuma između Vijeća ministara BiH i Vlade Republike Albanije o međunarodnom drumskom prijevozu putnika i tereta,
- c) Deklaracije o dugoročnom programu regionalne saradnje i razvoja mentalnog zdravlja u zemljama Jugoistočne Evrope,
- d) Sporazuma o finansiranju između BiH i Komisije Evropskih zajednica o programu finansiranja učešća BiH u ERDF Evropskom programu međunarodne teritorijalne saradnje Prostor jugoistočne Evrope na osnovu instrumenata za pretprijetupnu pomoć (IPA) komponenta prekogranične saradnje za 2007.g.,
- e) Ugovora o finansiranju između BiH i Evropske investicione banke – Projekat Koridor V c – prva faza – Sjever,
- f) Sporazuma o privrednoj saradnji između Vijeća ministara BiH i Vlade Republike Slovenije.

Predsjedavajući je podsjetio da je nadležna Komisija za vanjske poslove dala pozitivno mišljenje za davanje saglasnosti za ratifikaciju akata iz ove tačke.

Nije bilo rasprave.

Predsjedavajući je predložio da se Dom izjasni u paketu o ovoj tački, pa je ovaj prijedlog dao na glasanje. Prijedlog je usvojen sa 35 glasova "za" (Federacija BiH 23, RS 12), a jedan poslanik se "suzdržao".

Zatim je, sa 37 glasova "za" (Federacija BiH 23, RS 13) i jednim "suzdržanim", Predstavnički dom dao je saglasnost za ratifikaciju akata iz ove tačke.

Ovim je realiziran dnevni red 48. sjednice.

Sjednica je završena u 14,30 sati.

Sastavni dio Zapisnika je transkript 48. sjednice Doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Beriz Belkić**